



Inatsisartunut ilaasortaq
Malik Berthelsen
Siumut

Besvarelse af § 36 spm nr 2010-134 af Malik Berthelsen grl

1. juli 2010
Sagsnr. 2007-003194
Dok. Nr. 407804

§ 36 naapertorlugu AFS pillugu apeqqummut nr. 2010-134-mut akissut.

Postboks 1029
3900 Nuuk

Inatsisartut suleriaasianni § 36, imm. 1 naapertorlugu 17. juni 2010-mi Naalakkersuisunut ima apeqquaqarputit:

Tlf: +299 34 50 00
Fax: +299 32 20 73
Email: kiin@nanoq.gl
www.nanoq.gl

1. Meeqqat Atuarfianniit naammassisut AFS aqutigalugu nunanut allanut ukiartortartut amerlanerulernissaat Naalakkersuisut sulissutiginnissaat eqqarsaatiginnannaanerlugu?
2. AFS-ertartut 18-it inorlugit ukiullit pisortaniit aningaasatigut qinnuteqaqqaanngikkaluarlutik toqqaannartumik efterskolertartutuulli taperneqartalersinnaanissaat Naalakkersuisut eqqarsaatiginnannaanerlugu?
3. Inersimasut qitornaqalereersimasut tuluttut pikkorissarniarlutik nunanut allanut ukiartorusuttut sutigut pisortaniit ikiorneqarnissamik periarfissaqarpat?

Naalakkersuisut apeqquqinnut qujapput, apeqququtillu ataatsimoortillugit akineqarput.

Ilinniagaqarnersiutit pillugit Namminersornerullutik Oqartussat nalunaarutaani nr. 8-mi., 27. marts 2008-meersumi § 58 naapertorlugu qaammatit arfinillit sinnerlugit sivilissuseqartumik Kalaallit Nunaata Danmarkillu avataanni paasisassarsiornerit ilinniartitaanermut attuumassuteqanngitsut nunallu tamalaat ilinniartunik paarlaasseqatigiissitsisarnermut suliniaqatigiiffiinit aaqquissuunneqartunut atatillugu Kalaallit Nunaanni aalajangersimasumik najugarisap nunamilu allami ornigassap akornanni siumut utimullu akiliussisoqartassaaq.

Oqaatsinik Pikkorissarfik angalanernik aqutsisuusoq, ukiumoortumik 500.000,- kr.-inik missingersuuteqarpoq. 2009-mi atukkat 850.000 kr.-iupput. Taamaalilluni missingersuutigineqartut sinnerlugit nunanut allanukartarput. Oqaatsinik Pikkorissarfimmit oqaatigineqartut paasinarsisippaat ukiuni kingullerni kalaallit inuusuttut 60-it 70-illu akornanniittut ukiut tamaasa nunanut allanut paarlaasseqatigiillutik aallartartut. Ukiuni kingullerni taaku amerliartorsimapput.

Inuusuttatta atuarfiup kingorna nunani allaniissinnaanissamut periarfissaqarluarnissaasa pingaaruteqassusia Naalakkersuisut isumaqatigaat. Misilittakkat paasinarsisippaat nunami allamiinnikkut inuusuttut nutaanik isumassarsikkajuttartut, perorsimanerulerlutik ilisimasaqarnerulerlutillu, tamannalu aamma inuiaqatigiinnut iluaqutaasorujussuuvoq.

Paragrafimi qulaani taaneqartumi allassimavoq qaammatit arfinillit sinnerlugit sivilissuseqartumik Kalaallit Nunaanni aalajangersimasumik najugarisap nunamilu allami ornigassap akornanni siumut utimullu akiliussisoqartassasoq. Qaammatit arfinillit inorlugit

nunami allamiinnermi angajoqqaat namminneq aningaasartuutitut tamanut akiliissaput. Tamanna pisarpoq amerlanerusut nunami allamiinnissamik toqqaaniassammata, inuusuttoq oqaatsitigut ineriartornikkullu pissarsiaqarluarnerpaatinniarlugu.

Nalunaarummi taaneqartumi najugaqarnermut aningaasartuutit akiliinerup ilannguneqarsimannginneranut tunngaviuvoq paarlaasseqatigiisitsisarfiit namminersortut inuusuttunut ilinniartitaanerup avataatigut nunami allami immikkut ilinniarnissamik neqerooruteqartartut pineqarnerat.

Nunami allami qaammatini qulini oqaatsinik ilinniarneq Oqaatsinik Pikkorissarfimmit nalunaarutigineqartutut 45.000 kr.-it aamma 70.000 kr.-it akornanni akeqartarpoq timmisartumut billeti angajoqqaat utertittagaat ilanngullugu. Tamatuma saniatigut danskit undervisningsministeriaqarfia inuusuttunut 18-it inorlugit ukiulinnut nunami allamiittunut tamanut 10.000 kr.-inik tapiisarpoq ilinniartumut ataatsimut tapiissutit assigiinneq ajorlutik 25.000 kr.-it tungaanoortarlutik. Angalanermut matussutissat saniatigut Nunafondenimit (10.000 kr.) aamma Cirusimit (10.000 kr.) tapiiffigitinnissamik qinnuteqartoqarsinnaavoq.

Naalackersuisut nassuerutigaaq allaat Namminersorlutik Oqartussanit, danskit undervisningsministeriaqarfiannit kommuniniillu siusinnerusukkut taaneqartutut tapiissuteqartoqartaraluartoq inuusuttut nunani allaniinnerannut aningaasartuutit tamarmiusut ilarujuusuinut angajoqqaat akiliisarmata tamannalu tunngavigalugu qularnanngitsumik angajoqqaat akissakinnerusorpassuit meeqqamik oqaatsinik ilinniariartortinnissaat anusinngutigisaraat.

Inuusuttut tamarmik, angajoqqaamik isertitaat apeqqutaatinnagit nunani allami oqaatsinik ilinniariarnissamut periarfissaqarnissaat Naalackersuisut pingaartippaat taamaattumillu tamatuma qanoq naapertuunnerpaamik pisinnaanera misissorniarlugu. Sisimiuni Friskolemi atuartut The Globe Exeterimeeqqammerput. Oqaatsinik Pikkorissarfimmit kaammattuutigineqarpoq nunami allamiinnerup tassuma naliliiffigineqarnissaa utaqqineqassasoq.

Naliliineq taanna tiguneqareerpat Naalackersuisut 2010-mi ukiap ingerlanerani inuusuttut nunani allaniittarnerannut siunissami tapiissuteqartarnissaq pillugu aalajangersimarusumik nalunaaruteqarumaarput.

Namminersornerullutik oqartussat ilinniagaqarnersiutit pillugit nalunaarutaat nr. 8 27. marts 2008-meersoq malillugu inersimasut meerallit tuluit oqaasiinik ilinniarnissaq siunertaralugu nunani allami najugaqarnissamut tapiiffigineqarsinnaanerit periarfissaqanngilaq. Nalunaarummi taamaallaat aalajangersaavigineqarsimapput ilinniartitaanerit tapiiffigineqarsinnaasut tapiiffigineqarsinnaasutut nalunaarsimasut aammalu aalajangersaavigineqarsimanngillat oqaatsinik ilinniarnissaq siunertaralugu angalanerit imaluunniit nunani allami oqaatsinik pikkorisarnerit assigisaalluunniit inersimasut meerallit pillugit.

Inussiarnersumik inuulluaqqusilluta